

明

史

稿

明

史

稿

明史藁

列傳第一百八十四

光祿大夫

經筵講官明史總裁戶部尚書加七級

臣

王鴻緒奉

敕編撰

湖廣土司

施州

永順軍民宣慰使司

保靖州軍民宣慰使司

西南諸蠻有虞氏之苗商之鬼方西漢之冉駹邛犂自巴夔以東竝湖南北嶺嶠內外數千里種類各別歷代以來各有大姓爲之主北魏所稱冉氏向氏田氏南宋所稱舒氏彭氏蘇氏楊氏皆是也然原其爲王朝役使自周武伐紂孟津大會而庸蜀羌髳微盧彭濮諸蠻皆與焉蜀漢授羅伽季恢爲

郡功曹王簿晉以興古蠻深爲本郡太守宋太祖用徭人奉
冉雄使治辰州此卽土官土吏之所始歟然未嘗郡縣其地
籍屬其民有明踵元舊事大爲恢拓竟繫維而呼喚之可謂
車書極盛之會矣然馭蠻之法僅在羈縻彼其大姓相擅世
積威約而必假我爵祿寵之名號乃易爲統攝我於其間折
箠使之奔走惟命矣第調遣日繁急而生變恃功怙過侵擾
益深故歷朝徵發利害各半此王守仁有不調土兵之議也
然其要在於撫綏之得人實錄載成化十八年馬平王簿孔
性善言溪峒蠻獠雖常梗化亂豈無因昔陳景文爲令徭獠
皆應差徭厥後撫字乖方始仍反側誠使守令得人示以恩
信諭以禍福亦當革心帝嘉納之惜未能實究其用斯言也

可爲治蠻之寶鑑矣嘗考洪武初西南夷來歸者卽用原官授之其土官銜號曰宣慰司曰宣撫司曰招討司曰安撫司曰長官司襲替必奉朝命雖在萬里外皆赴闕受職天順末許土官繳呈勘奏則威柄漸弛成化中令納粟備賑則規取日陋孝宗雖發憤釐革而因循未改嘉靖九年始復祖宗之舊以府州縣等官隸驗封宣慰招討等官隸武選隸驗封者布政司領之隸武選者都指揮領之殆文武相維矣其間叛服不常誅賞互見茲據其事蹟尤著者列於篇

湖南古巫郡黔中地也其施州衛與永保諸土司境介於岳辰常德之西與川東巴夔相接壤南通黔陽谿洞最深阻易寇盜元末滋甚陳友諒據湖湘間噉以利資其兵爲用諸苗

亦爲盡力有乞兵旁寨爲之驅遣者友諒以此得志及太祖
殲友諒於鄱陽進克武昌湖南諸郡望風歸附前元時所置
宣慰安撫及長官司之屬亾慮數十輩皆先後迎降太祖卽
以原官授之示羈縻而已久之蘖芽其間漸有梗化者洪武
三年慈利安撫使覃垕連構諸洞蠻爲寇征南將軍周德興
平之五年復命鄧愈爲征南將軍率師平散毛等三十六洞
而副將軍吳良復平五開古州諸蠻凡二百二十三洞籍其
民一萬五千收集散士卒四千五百四十餘人平其地未幾
五開五谿諸蠻亂討平之十八年五開蠻吳面兒反勢獷甚
命楚王楨將征南將軍湯和等擊斬九谿諸處蠻獠俘獲四
萬餘人諸苗始有所懲創而靖沅道澧之間十年之內蠻亦

尋起尋滅雖開國之初師武臣力亦太祖所以控制之者恩威之道備焉永樂靖難苗告繼絕蒙襲冠帶稍就銜勒垂及百年而五開銅鼓之間又紛紛以蠻警聞矣時英宗北狩中原所在侵擾苗勢燎原景泰初年總兵官官聚奏蠻賊西至貴州龍里東至湖廣沅州北至武岡南至播州之境蠻衆不下二十萬圍困焚掠諸郡邑臣所領官軍不及二萬前後奔赴不能解平越之圍乞急調京邊軍及征麓川卒十萬前來以資調遣久而師徵不至聚亦不能辦賊更易他帥浸淫六七載至天順元年總督石璞調總兵官方瑛始尅期征勦破天堂小坪墨溪二百二十七寨擒僞王侯伯等百餘人斬賊首千四百九十餘級奪回軍人男婦千三百餘口於是苗患

漸平蓋萌發於貴州而蔓延於湖南咸生苗爲梗諸土司皆
亾動搖而永保諸宣慰世席富強每遇征伐輒願荷戈備前
驅國家亦賴其力以彰撻伐故永保兵號爲燒雄嘉隆以還
徵符四出而湖南土司均備臂指矣

施州隋爲清江郡改施州明初仍施州洪武十四年改置施
州衛軍民指揮使司屬湖廣都司領軍民千戶所一曰大田
宣撫司三曰施南曰散毛曰忠建安撫司八曰東鄉五路曰
忠路曰忠孝曰金峒曰龍潭曰大旺曰忠峒曰高羅長官司
七曰搖把峒曰上愛茶峒曰下愛茶峒曰劍南曰木冊曰鎮
南曰唐崖蠻夷長官司五曰鎮遠曰隆奉曰西泮曰東流曰
臘壁峒而容美宣撫司亦在境內領長官司四曰椒山瑪瑙

曰五峰石竇曰石梁下峒曰水盡源通壩平初太祖龍興之
甲辰卽吳王位六月湖廣總督宣撫使向思明遣其長官硬
徹律等以元所授宣撫敕印來上請改授命仍置安定等處
宣撫司設宣撫使二以思明及其弟思勝爲之又置懷德軍
民宣撫司設宣撫使一以向大旺爲之統軍元帥二以南木
潘仲玉爲之抽攔不用黃石三洞各置長官一以沒葉大蟲
硬徹律爲之斡坪洞元帥府設元帥一以向顯祖爲之梅梓
麻寮二洞各置長官一以向思明唐漢明爲之皆新降者丙
午二月容美洞宣撫使田光寶遣弟光受等以元所授宣撫
敕印來上命以光寶爲四川行省參政行容美洞等處軍民
宣撫司事仍爲置安撫元帥以治之吳元年改容美宣撫爲

黃沙靖安麻寮等宣撫司以田光寶掌司事竝立太平臺宜
麻寮等十寨長官司洪武四年宣寧侯曹良臣帥兵取桑植
容美洞元施南道宣慰使覃大勝弟大旺副宣慰覃大興宣
撫同知隆中路南木金峒達谷忠孝墨谷隆奉驢谷東鄉東
路軍民知府結刺及容美宣撫田光寶子荅谷等來朝納元
所授金虎符命以施州宣慰司爲從三品東鄉諸長官司爲
正六品以流官土司參用五年忠建元帥府元帥墨池遣其
子驢吾率所部溪洞元帥阿巨等來歸附納元所授金虎符
并銀印銅章誥敕置忠建長官司及沿邊溪洞長官司以墨
池等爲長官二月容美宣撫田光寶遣子荅谷來朝仍改容
美宣撫司爲長官司秩正六品以光勝爲長官四月征南將

軍部愈平散毛柿谿赤谿安福等三十九洞五月散毛宣慰
司都元帥覃野旺上所授僞夏印七年詔置容美洞宣撫及
家鄉寨五里自唐崖椒山瑪瑙等六長官司十四年江夏侯
周德興移師討水盡源通塿平散毛諸洞悉平之置施州衛
軍民指揮使司十五年置施南宣撫司隸施州衛十七年散
毛沿邊安撫司安撫覃野旺之子起刺來朝命爲本司僉事
景川侯曹震言散毛等洞蠻時寇掠爲民患已令施州衛及
施南宣撫覃大勝招之如負固請發兵討二十二年命忠建
宣撫田思進之子忠孝代父職時思進年八十餘乞致仕故
有是命明年三月涼國公藍玉克散毛洞擒刺惹長官覃大
旺等萬餘人閏四月置大田軍民千戶所隸施州衛以藍玉

奏散毛鎮南大旺施南等洞蠻叛服不常黔江施州衛兵相
去遠難應援今散毛地與大水田連宜置千戶所守禦乃改
散毛爲大田命千戶石山等領土兵一千五百人置所於大
田鎮之時忠建施南叛蠻結寨於龍孔玉遣指揮徐玉將兵
攻圍之擒宣撫覃大勝餘蠻退走依山寨自固玉復分兵破
之殺獲蠻人男女一千八十餘人械大勝及其黨八百二十
人送京師磔大勝於市餘戍開元給衣糧遣之永樂二年復
設散毛施南二長官司先是洪武初諸土司長官來降者皆
予原官十八年蠻苗吳面兒之亂諸土司多梗化因命楚王
楨將征南將軍湯和等平之俘斬數萬人諸土司地多荒廢
長官亦罷承襲至是故土官之子覃友諒等以招復蠻民請

仍設治所以其戶少降爲長官司隸大田軍民千戶所以友
諒爲散毛長官覃添富爲施南長官四年改施南散毛二長
官司仍爲宣撫司以友諒添富來朝故也復以田應虎爲龍
潭安撫時應虎來朝言其祖父自宋元來俱爲宣撫自蠻亂
併其地入散毛隔遠難治乞仍舊從之時高羅安撫田大民
言招復蠻民四百餘戶乞還原職治所木冊長官田谷佐唐
崖長官覃忠孝並言父祖世爲安撫洪武時大軍平蜀民驚
潰治所廢今谷佐等招集三百餘戶請襲許之五年正月鎮
南長官覃興等來朝稱係世職洪武中廢今招徠蠻民三百
戶乞仍舊旣五峰石寶長官張再武亦以襲職請從之同時
設東鄉五路安撫以覃忠爲之隸施南設石梁下峒椒山瑪

瑤水盡源通塢平三長官司以向潮文劉再貴唐思文爲之
隸容美旣復設忠路忠孝金峒三安撫司隸施州衛以覃英
田大英覃添貴爲之皆因洪武間蠻亂民散廢其治今忠等
以故官子姪來朝奏請復設竝從之各賜印章冠帶宣德二
年設劍南長官司以牟曾蠻爲之隸忠路安撫司搖把峒長
官司以向墨古送爲之上愛下愛二茶峒長官司以向惡送
譚成威送爲之鍾邊隆奉二蠻夷官司以譚惹添旺田友晟
爲之皆隸東鄉五路安撫司東流臘壁峒二蠻夷官司以田
銘田興爲之皆隸散毛宣撫司石關峒長官司以覃萬勇爲
之西坪蠻夷官司以秦萬山爲之隸金峒安撫司先是忠路
安撫司等各奏前元故土官子孫牟曾蠻等各擁蠻民久據

竊謂今就招撫請設官司授以職事行在兵部以聞帝以馭
蠻當順其情所授諸司室有等殺兵部議以四百戶以上者
設長官司四百戶以下者設蠻夷官司元土官子孫量授以
職從所招官司管屬皆從之冷三年一朝貢如故事九年木
冊長官田谷佐奏高羅安撫常倚勢凌轢之侵奪其土地人
民已蒙朝廷分理然彼宿怨未平恐復加害乞徑隸施州衛
從之正統三年命散毛宣撫覃友諒子瑄試職初友諒以罪
械赴京中路叛匿後爲官軍所獲斃獄至是本司以其子爲
蠻民所信服乞襲職帝以友諒罪重宜革第以蠻故詘法信
恩命瑄試職圖後効景泰二年禮部奏散毛宣撫司副使黃
縉瑄謀殺親兄律應斬其妻譚氏遣子忠等貢馬贖罪然瑄

罪重法不可宥宜給鈔以酬其馬直從之天順元年容美宣撫田潮美老疾請子保富代職從之五年六月禮部奏施州木冊長官司土舍譚文壽在鄉兇暴代人書奏造不法誹謗之言法司論罪當刑今文壽母向氏進馬以贖如從之恐土人無忌憚相效成風帝命給鈔百錠以慰其母其子文壽仍錮禁之成化元年施州散毛等四宣撫司忠孝等八安撫司賀冊立中宮表文久不至所司劾不敬命宥之二年忠路安撫搖把洞長官向麥荅踵奏鄰近洗羅峒長窺知本洞土兵調征兩廣村寨空虛煽誘土蠻攻劫乞調官軍勦治五年禮部奏湖廣容美宣撫司及五峰石寶長官司田保富等遣人進貢方物稱較不足恐所遣者不無侵盜宜停其賞仍移文

所司俾懲其後從之禮部復奏施州等衛散毛金峒施南忠孝龍潭忠路東鄉五路桑植八安撫司各奏成化五年朝覲進馬已付邊衛騎操而諸衛收馬文移不至恐有虛詐宜勘實按賞從之十年禮部奏湖廣金峒等八安撫司賀冬至表箋踰期不至宜究問帝以土官姑恕之令巡按戒諭弘治二年木冊長官田賢及容美致仕田保富各進馬爲土人譚敬保秦墨古送贖罪刑部言蠻民納馬贖罪輕者可原重者難宥宜下巡按察處八年容美宣撫貢馬及香禮部以香不及數馬多道亾又無明文可驗命予半賞九年金峒安撫司覃彥龍奏境內土產杉木嘗鬻價三千貯庫今彥龍年老子惟一恐身後土人爭奪乞取解部工部議非貢典却之正德